

الفاجومي

أبو كوعلى الشمروخ..

بابــــــــــــــــوص

■ أبو علي الشمروخ مكانش له مثنوى.. محل الإقامة
تحت شجرة المنجھ

■ كبس الإنجليز على العزله بحتا عن مسروقات من
الكنب

■ أشعلت النار في العرييه الحمله بالسروقات
المضبوطة

■ تم القبض على أبويا على بتهمه حرق العرييه ومات
في السجن



obeyikan.com

قالوا اللي يعيش ياما يشوف.. قلنا اللي يمشى يشوف أكثر.

وأنا كانت بايضة لي في القفص.. من صغري وأنا ماشي.. يعني على قد ما عشت مشيت وعلى قد ما مشيت شفت.

ناس يا ما مالهاش عدد قابلتني ع الطريق.. وشوش متركبه على صناديق مقفوله على حواديت.. اللي شبه بعضها كييته من دماغى.. مافاضلشي غير الحواديت الوحدانيه اللي مالهاش شبه.. معششه في نافوخي ومكلبشه ف قلبي لساها بتعن على زي الجرح القديم.. وافتح وشوف..

ماحدثش في البلد كان يعرف له أصل من فصل.

طلعنا لقينا الكبار يقولوا له (يا با على).. قلنا زيهم.

فقير.. فقير.. فقير.. على رأيه هو:

- أجب لك منين يا شيخ الغفر.. دانت كرشك يبلع جاموسه بخراها.. والراعى اللي وراها.. وأنا أفقرم الدبور لاحمر.

سألناه:

- واشمعنى الدبور لاحمر يابا على؟

قال لنا:

- حاكم الدبابير الصفرا زي النحل بتفرش عشوشها قبل ما تسكنها.. إلا الحزين لاحمر يفجر له خرم في الحيط وينام على لحم الخرم.

وأبوكو على الشمروخ لا كان مالك ولا مستأجر.. ولا حتى مرابع.. كان حته تمللى. يعنى عامل باليوميه ماحيلتوش إلا عينه وحيله ومواله الوحدانى:

إن مال عليك الزمان.

يابن الكرام



باعك

شمر ذراعك

وقوم ميّلى على ذراعك

ومكانش له متوى.. المقر الدائم ومحل الإقامة.. صيف وشتا.. تحت شجره المانجه
الهنديه فى جنينة جدى البيهه الشوادى العمده العظيم الفخيم السلى مره عزم خديوى
مصر شخصياً على الغدا وطلع له صينية الغدا دهب وعليها الأوزى محشى ومشوى
وواقف على رجله!
وذات مره سألته:

- إنت يابا على ما تبردش إزاي وانت نايم فى الطل؟ داحنا بتتكتك م البرد واحنا
تحت الغطيان.

ضحك وقال لى:

- يا عبيط.. ربك رب العطا.. يدى البرد على قد الغطا.

عمرى ما شفته صالب طوله.. كان دائماً متنى لتحت.. يا إما ماسك الفاس
وبينكش بطن الأرض. يا إما شايلى الكريك.. ويحمل تراب أو سباخ.. وحتى لما
كان يقف أو يقعد يلقط نفسه.. برضه كان بيقى متنى لتحت.

الواد غريب ابن أم تهائى فى مره قال لنا:

- أصل أبوكو على.. بيكسل يقف.

وكان عندى ابن عم دماغه لادع اسمه الأستاذ نجم لكن كان دمه خفيف.. كان
يلم البط والوز والمعيز والفراخ حواليه ويطلع لهم أكل من جيوبه ويفضل طول ما
بياكلوا يكلمهم كلام مش مفهوم ويضحك.. وكان بيصطاد التعابين ويخلع سنانهم
بطاقيه صوف وبعدين يفتح بطونهم ويدور على خاتم الملك اللى خياه سيدنا سليمان
من شمهورش ملك الجان أثناء ما كانوا بيفتحوا البحر!

الأستاذ نجم ده مره وإحنا قاعدین علی کوبری الملک قال لنا:

- بصوا كده يا ولاد علی أبو کو علی الشمروخ.. وقولولي شایفین إيه؟

وبعدین ضحك مع معزه السيد أبو یوسف وقال لنا:

- أبو کو علی دا مش واحد.

الواد أحمد أبو هنداو ی ضحك وقال له:

أمال کام؟

قال:

- اتنين.. واحد رأسی وواحد أفقی.

ورجع تانی یضحك مع المعیز واحنا ما فهمناش حاجه.

وماكانش أبویا علی الشمروخ یملك من دنياه غیر الجلايه الزرقا القديمه اللی كان أصلها خیمه وكوز السلامون المصری اللی كان یعمل فیہ الشای الزرده ویشربه فیہ برضه!

كان وشه أصفر ومكرمش ورقبته صفرا ومكرمشه وإديه مقشفه وبتخرمیه صفرا خصوصاً فی البرد وكنت شقایفه مشققه ولولا الأنیمیا كانت جابت دم.. وكان طول النهار یلحسها بلسانه عشان یطربها!.. وكانت رجلیه صیف شتا ما بتبانس من القشف والحراشیف اللی كاسياها زی ضهر الزحلفه.

المدھش إنه ماكانش شایف أی إخراج فی المسأله دی.. وكان أوقات الصفا واحنا ملمومین حوالیه یمد لنا رجلیه ویقول:

- شایف یاواد إنت وهو البلغه الربانی دی؟ صیفی شتوی.. لا تدوب ولا تروح للصرماتی.

ویکمل:

- إن شاء الله وبإذن واحد أحد یوم الموقف العظیم ح استأذن سبحانه وتعالی

وانسألُ فردَه على لبدَه شيخ الغفر وفردَه على عمه الشيخ عيطه.

كان كل شيء في أبويا على شبه ميت إلا حاجتين.. لسانه الحراق وعينيه الصاحيين.. لما كان يغضب كنت تشوف فيهم ماسورتين بندقيه ميزر.. ولما كنا بنتلم حواليه ونتوه في حواديته الجميله ويحس هو بسعادتنا باشوف فيهم بحرین حنان صافيين.

مره قلت له:

- نفسى يابا على أقلع بلبوص وانزل استحمى فى عينيك.

ضحك من قلبه وقال لى:

- تغرق يا بو عزت.. وأروح من أمك فىن؟

وفى يوم من ذات الأيام حصلت علينا كبسه إنجليزية.. ودى كانت دائماً بتحصل بشكل مستمر على جميع البلاد والعزب والكفور والنجوع المحيطة بمعسكرات الاحتلال الإنجليزي فى منطقته قنال السويس اللى بتبدأ بمعسكر محجر أبو حماد وتنتهى فى السويس وبورسعيد.. كانوا بيداهمونا بحثاً عن مسروقات عبارَه عن معالق وشوك وسكاكين وبطاطين وملايات وناموسيات وصحون وفناجين.. كلها بتباع علنى كل يوم اتنين فى سوق أبو حماد العمومى وعشان كده كانت لازم أى كبسه تسفر عن مضبوطات يلزم لها متهمين يدبرهم شيخ الغفر ويتحاكموا أمام القضاء المصرى اللى كانت أحكامه عليهم بتتراوح بين شهر وست شهور سجن مع الشغل والنفاذ.

وشهادَه لله إن الإدارة المصرية ماكتتش بتقصر فى واجبها تجاه القوات الحليفه وكانت كل جهه عارفه اختصاصها وتتأديه على أكمل وجه.

العمده يستقبلهم لحظة الوصول ويقدم لهم التحية والترحيب مصحوبين بشأى الصباح يبلَّعوه بالمتين والغريبه وما شابه ذلك ويحضر لهم الغدوه المعتره يلهفوها بعد نهايه الكبسه وهما راجعين مستصيرين ع الفلاحين وماسكينهم تلبس وشيخ البلد

مستول قسم الهدايا اللى هى عباره عن كميات من القشطه والزبده والفطير المشلتت وعسل النحل والبيض والطيور والفواكه والخضروات ولا سيما البطيخ والعنب والمانجه والموز والخيار والطماطم وكل دا بيتلم من غيطان وبيوت الفلاحين بالسحت وعدم الرضا.

أما شيخ الغفر فكان يستقبلهم بحرس الشرف ويعين له غفيرين لحراستهم وخدمتهم وبعدين يقبضوا لهم على المتهمين اللى يحدددهم شيخ الغفر.. يشيلوهم المضبوطات ويسوقوهم على أوضه التليفون اللى هى تخشيبه الأرياف حين ترحيلهم للسجن.

خرجت الحمله من سرايا العمده بعد شأى الصباح فى اتجاه بيت خالى حسن أبو مهدي ودا معناه إنهم يمروا على موقع أبويا على الشمروخ فى جنينه البيه الشوادفى.. كان أبويا على لحظتها بيحمل سباخ ع الحمير وإذ بالحمله تتوقف قصاده ويسأله الترجمان المصرى اللى بيصاحب الحمله المكونه من الكابتن واثنين جنود والسواق:

- إنت يا راجل جايب الجلايه اللى إنت لابسها دى منين؟

ورد أبويا على بمنتهى الجديه:

- من بنك سمعان يا خواجه.

ويظهر إن الترجمان مافهمش النكته فقال له:

- إنت راجل كداب.. الجلايه دى قماش إنجليزى.. بالأماره كان أصلها خيمه.

قال:

- وافرض؟

قال له:

- تبقى حرامى.

ضحك أبويا على وقال له:

- والعمل يا شريف؟

قال له:

- تروح السجن.

اتنهد أبويا على وقال له:

- ريحت قلبي الله يريح قلبك.. مش هناك ح اكل واشرب واشخ وانام؟ ورطن

الترجمان مع الكابتن والحاشيه وبعدين غير لهجته وقال بمتهى الود:

- اسمع يا عم الحاج.. الكابتن مستخسر ك فى السجن وييقول إنك مش وش

ذلك.

وضحك أبويا على وقال له:

- وبناء عليه؟؟

وابتسم الترجمان يمكن لأول مره فى حياته وقال له:

- تعجبني كده يا حاج.. بناء عليه بقى تشوف معاك حاجه للكابتن وتفضل

جلابيتك ساتراك ويا دار ما دخلك شر.

قال له بجديه:

- وتدوني بيها مبايعه؟

قال له:

- نديك اللي إنت عايزه.

قال له:

- طب يا أخى مش تيجى عدل م الأول؟.. هو احنا لينا بركه إلا الكابتن ورجالة

الكابتن.. خد يا سيدى.

وفى ظرف ثانيه كان مالخ الجلابيه ومكورها وحادفها فى وش الكابتن:

- آدى اللى معايا.

الكابتن فؤجىء بالحركه ورجليه ما علمتش ع الأرض ماتعرفش خوف من أبويا على ولا من محتويات الجلاييه من قمل وبراغيت وخلافه. والحاشيه طلعت تجرى وراه وفاتوا أبويا على واقف بلبوص ويحمل السباخ ويضحك ويقول:

- بطلوا ده واسمعوا ده.. الحرامى بيقول لصاحب البيت بخ.. آه يا زمن عايب!

وشاع الخبر فى العزبه:

- أبوكو على الشمروخ واقف بلبوص فى جنينه البيه الشوادفى وحاله باين والنسوان بيروحوا يبصوا عليه ويرجعوا مخبين وشوشهم بالطرح ويضحكوا!

وجريت على جنينه جدى البيه الشوادفى أشوف النسوان يبضحكوا على إيه؟.. لكن مع الأسف رحلت لقيت أبويا على لابس جلاييته وواقف يحمل سباخ كالعاده وسألته:

- خبر إيه أمال يابا على؟

قال لى:

- خيرك أسود.

قلت له:

- اللى شايع فى البلد خبرك إنت مش خبرى أنا.

قال لى:

- لادد عليك اللى بيعجرا فى بلدكو دا يابو عزت؟

قلت له:

- إنت ما سمعش شيخ الغفر وهو بيقول للغفر الإيد اللى ماتقدرش على قطعها

بوسها؟

قال لى:

- حد علمى إنك اتدلّيت غفير.

قلت له:

- فشر.

قال لى:

- تبقى شيخ غفر.

قلت له:

- فشرين.

قال لى:

- أمال مالك؟

قلت له:

- مالى على الله.

قال لى:

- شايف إيه واقف قدام سراية عمدتكو التنبل؟

قلت له:

- كومبيل إنجليزى ومحمل من خيرات الله.

قال لى:

- وعارف ده كله حيروح على فين؟

قلت له:

- ع الكامب طبعا.

ضحك وقال لى:

- هو الكامب بيلم زباله وقمل يا أهبل؟. الحاجات دى حياخدوها ويبيعوها تانى فى سوق لتنين ويرجعوا يظبطوها تانى وياخدوا فى نواتيها جدعين تلاته غلابه يحبسوهم.. عشان يبقى موت وخراب ديار.. زى الغلبان أبو العيال أنور ابن عمك اللي حبسوه الكفرة ولاد الكلب.

قلت له:

- وأبويا العمده عارف ده كله؟

قال لى:

- أبوك العمده حرامى وبيقسم معاهم وإن ماكانش ييقسم معاهم يبقى خدام إنجليز كلب ابن كلب.

قلت له:

- طب وإنت ساكت ليه يابا على؟

قال لى:

- اسمع ياد يابو عزت.. لو إنت واد دكر صحيح اتسحب على طراطيف صوابك وروح فسى العجل واطلع من بره بره على داركو.. ماتخافش هما دلوقتي ملهين فى بطونهم وبيطفحوا الدردي فى السرايه.

أنا طبعا وكعادتى أحب لما اعمل العيبه ما اطلعهاش ناقصه!

- إيه يعنى أفسى العجل؟!.. طب ماهم حيفخوه تانى.

طيران على دارنا سهيت أمى وسحبت لتر الجاز وعلبه الكبريت الهلب وعلى طراطيف صوابى ومن جنب الحيط واتسحبت لغاية ماوصلت للعربيه اللي عليها جبال من البطاطين والناموسيات والملايات.. كانوا لتجليز بياكلوا فوق والغفر بياكلوا فى أوضه التليفون وفى ثوان كنت دالق الجازع البطاطين وشاكك عود

الكبريت الهلب راميه ع الجاز وخذت القسط وعلى بيتنا حمامه.. لقيت أمى بتسخن العيش للغدا قعدت معاها وبدأنا نتغدى لقمه و الثانيه والتالته والفرقه إستغلت.. أصوات زى أصوات الكنابل إالى بترميمها الطيارات الألمانية ع الانجليز بالليل وويك ويك الصوات اشتغل وشويه وسمعنا صوت شيخ الغفر لأول مره بيستغيث:

- روحوا يا اولاد... تعالوا يا اولاد.

وطلعت الناس اللى فى البيوت وجريت الناس م الغيطان على مصدر الصوت.. صوت الاستغائه اللى طالع من سرايه العمده لأول مره برضه.

أمى قالت:

- يالهوى الغاره الألماني بالنهار؟.. ذى علامات الساعه اللى وصى عليها حسان اليماني.. أشهد إلا إله إلا الله وأشهد أن محمداً رسول الله.

أنا حصل لى شويه لخبطه.. أروح.. ما اروحش؟.. وشويه شويه سكتت الفرقة والصوات وبدأت الأصوات تهدأ وإذا بأمى تفقع بالصوت وتخرج حافيه جرى فى اتجاه الأحداث فقلت ما بدهاش جريت وراها فى اتجاه سراية العمده.. لقيت مشهد فى غاية الغرابه.. العرييه عباره عن فحمه غرقانه ميه والغفر حوالها ماسكين جرادل وغرقانين ميه وأخونا الكابتين ما بقاش كابتين.. دا شخص يا ولداه وشه أصفر وواقف مفرشح وناسى فوطه السفرة على صدره وبيكلم نفسه ويضحك والتفرين لتجليز واقفين مسهمين وبيصوا لبعض ووشوشهم ضاربه بلمونى على زرقان.. والترجمان اختفى والعمده ماسك خرزانه وبيشوح بيها فى الهوا والأهالى واقفين على بُعد بيتفرجوا وهما ساكتين لكن وشوشهم فيها لؤم وشماته.. وفجأه صرخ العمده فى وش شيخ الغفر:

- الفاعل كوم وعمرك كوم ياسيد.

وإذا بصوت أبويا على جاى من ورا سور الجنيته:

- «.....» حمرا يا عمده.

بعض الأهالي قدر يكتم ضحكته وبعضهم ما قدرش.. لكن اللي ضحك ضاح
فى اللي ماضحكش - فى اللحظه دى - أنا شفت بعينى ما حدش قال لى.. شفت
العمده وهو بيهز دماغه مرتين لشيخ الغفر وشفت شيخ الغفر وهو بيشاور بدماعه
للغفرع الجنيهه وزعقت بعلو صوتى:

- طير يابا على.. اهرب يابا على.

وأفاجأ بمطرقه حديده نازله على صدغى.. دوشتنى.. أخويا العزيز عبد العزيز..
قرر فجأه إنه يتحمل مسئوليه الأخ الكبير المربى فراح نازل بكلوه إيده على صرصور
ودنى اليمين تترتنى يبجى ثلاثه متر قلبنى على جنبى الشمال.. وعبد العزيز ده كان
ممسوس علاوه على إنه فاشل فى الدراسه والحب والحياه.

المهم.. كل ما احاول أقوم راسى تغلبنى أروح نازل زرع بصل.. ما اعرفش
الوقت اللي فات قد إيه قبل ما اسمع صوت ضرب الدباشك وكعوب الجزم المبرى..
أنا قلت الدور على رحى فازز مرعوب لقتت أبويا على مرمى على ظهره وكل
الضرب دا فيه وهو مايقولش أه.. لحد ما كعب جزمه جه فى بطنه فصدرت عنه أهه
مكتومه زلزلت قلبى رحى جارى ورامى نفسى عليه وأنا باصرخ:

- سيبوه يا ولاد الكلب.. أنا اللي حرقتها.. سيبوه يا ولاد الكلب.. أنا اللي
حرقتها.

وظاقت الدنيا وسمعت صوات أمى وشميمه شيخ البلد فى الناس وزعق العمده
بصوت مرعوش:

- خدى ابنتك يا هاتم لحسن ودينى وأيمانى أرميهولك فى السجن مؤبد.

اتكاتروا على وشالونى من فوق أبويا على الشمروخ.. كان وشه غرقان دم.. لكن
عنيه كان فيها ابتسامه حسيت المره دى إنى استحميت فيها وجرجرونى على بيتنا
وكتفونى بحبل فى السلم النقالى.. ولما فكونى جريت على المنجايه الهنديه مالمقبتش
أبويا على الشمروخ.. خدوه ع السجن بتهمه حرق العريبه.. رجعت ع البيت
مكسور ومقهور.. وروحي يا أيام تعالى يا أيام وسمعنا إن أبوكو على الشمروخ..
مات فى السجن ألف رحمه ونور عليه.

